




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

ME 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws



Taitaifono Rev. Tautiaga Senara
FT - (2014-2015)

Fono Tele 2014

I le palota mo le Laulau a le Fono Tele, ua toe filifilia ai nei le sa Ta'ita'ifono, Susuga i le Toeaina Faatonu ia Tavita Roma, ma Sui Taitaifono, ina ua malo i le palota

na fai i le aso mulimuli o le Fono Tele, Aso Faraile. A ua see atu nei le sa Sui Taitaifono, i le nofoa o le Taitaifono, le Susuga i le Toeaina

faaauau itulau e 2



Suaina le Eleele mo le Iupeli Fou

O LE ATA: Taitaifono 2013-2014) Susuga Tavita Roma FT (totonu), Sui o le Fono a Sui Tofia Afioga Tuimalealiifano Vaaletō'a Sualauvi II, (taumata), Susuga Situfu Tanielu FT, (agavale) i le taimi o le suaina o le 'ele'ele (ground silasila itulau e 3

O le Mafuaaga o le pese:
“At Calvary”
 (“I KALEVARIO”)

Kalevario, o lona uiga, o le fanua o le ulupoo, ua tatou

faaauau itulau e 7

(Mo Matua ma Tupulaga Talavou)

DEATH AND DAWN

O le Oti ma le Tafaoata

“O le Alii, o lo'u leoleo mamoe o ia. E leai se mea ou te mativa ai.”

“Lau Susuga i le alii foma'i, e

leai se potu o avanoa. Ua tutumu uma potu o le falema'i,” o le faaaliga lea a le teine tausima'i.

faaauau itulau e 11

Fono Tele 2014

Faatonu, Tauti'aga Senara.

E le'i oo i le tausaga e palotaina ai le tofiga o le Failautusi Aoao, lea oloo seei ai le Susuga Rev.Dr. Iutisone Salevao. A o le palota mo le Teutupe a le Ekalesia, ua toe malo ai le oloo iai nei, le Susuga ia Kuatemane Ulutui FS.

O le Mau Autu o le Fono Tele 2014: "O le Alofa o le Faasinomaga lea o le Ekalesia ("Love, the EFKS Vision and Mission" = "E le sili lava le alofa o se tasi i lenei alofa, ia tuuina atu e se tasi lona ola mo ana uo."

Ua i'u ma le manuia le Fono Tele a le Ekalesia i lenei tausaga. Ua toe fo'i i fanua usuga fonu, i le tapua'iga i aiga, aulotu, pulega ma matagaluega e fia a le Ekalesia. Sa sasaa le fafao i le tofa mamao ma le faautautaga loloto i le mamalu o sui usufono uma, i le sailiga o le mea e sili ona lelei mo le manuia o le Ekalesia ma ona tagata, e tusa ai ma le finagalo o le Matai Sili i le lagi.

Sa folasia i luma o le Fono Tele lipoti mai Komiti uma a le Ekalesia - Komiti a le Au Toeaina, Komiti Faamisionare, Komiti o Feau Eseese, Komiti o Atiinae, Komiti o Tupe, Komiti o A'oga, Komiti Au Taumafai, Komiti Au Leoleo,.

O ia lipoti na silafia ai e sui usufono galuega sa feagai ai ma Komiti eseese a le Fono Tele, i lea tausaga faale-Fono Tele ua mavae, ma maua ai le avanoa o sui usufono e faaali ai o latou finagalo i ni mea latou te fia malamalama ai, poo ni fautuaga foi poo ni faitioga e tuuina mai, aua lava ni sologa lelei o galuega a komiti taitasi, ina ia ausia ai faamoemoega o le Ekalesia.

O Mau mai Matagaluega o isi ia avanoa e faatuina mai ai mai Matagaluega ni mea o latou fia fesoasoani mai ai e tusa o galuega fai a le Ekalesia. E aumai foi a

latou fautuaga, poo ni faitioga i ni mea latou te manatu e tatau ona faaleleia aua le sologa manuia o le Ekalesia. O ia faiga uma e faaalua ai le mafuaaga ua ala ai ona igoa le tatou Ekalesia, o le Ekalesia FAAPOTOPOTOGA. Ona e pulea e tatou uma, lea e faatinoina i le Fono Tele i Malua. Ae le gata i lea, o pulega foi faaaulotu, faapulega ma faa-matagaluega seia oo mai i le Fono Tele i Malua i tausaga taitasi.

Sa faafofoga foi le Fono Tele i Pepa Faapitoa na lautogia mo lea aso ma lea aso. O ia pepa na filifilia iai nisi o le Au Faigaluega a le Atua Susuga i Faifeau, sui o Afioga i Alii Tiakono, ma le Mafutaga a Tina, Sui o le Kolisi Faafaifeau i Malua, faapea ma Tupulaga Talavou. O Pepa o Mafaufauga Loloto e lu'itauina ai le Ekalesia i le savaliga i lenei foi tausaga faa-Fono Tele.

O isi vaega o le Fono Tele e sea sea ona ta'ua, o lauga a i latou ua tofia e ta'ita'iina sauniga lotu e amata ai taualumaga o le Fono Tele i lea aso ma lea aso. Ae le gata i lea, o lauga i sauniga lotu a le Au Taumafai, lotu o Nuu Ese, lotu mo i latou o le a penisione, lotu a le Mafutaga a Tina. lotu a le Au Leoleo E matua lelei ma malie i le faalogologo, aua o lauga ua saunia faapitoa mo le Fono Tele. E ta'ita'iina ai foi le ola faale-agaga i lea tausaga oi luma, ma le soifuaga faaauau atu i le lumanai.

A o le Fono Tele, o le taimi foi o mafutaga mafana a Pulega, a Matagaluega, ae tainane a Sui mamalu o le Fono Tele. Taimi o

le fe'oe'oea'i, o le fetufaa'i, o le fesilafa'i, ma le femili faatasi o uso ia Keriso. O le taimi foi o faafiafiaga faapitoa a autalavou, aulotu, poo pulega poo matagaluega. O le taimi foi o le pu'eata ma le siakiina o le toto maualuga ma le suka ma le faamalosi tino. A tu mai lava i tafatafa o lo tatou femiomioa'i i le Fono Tele ia fale'ie o le Koluse Mumu ma le Soifua Maloloina, ona tatou manatua lea, faaeteete i taumafa. E leai lava se aoga o lo tatou soona tago i taumafa e tele e laulauina, ae oo ina oso ai le toto maualuga, le gugu, le suka, le ma'i fatu, ma fatuga'o.

O le Fono Tele, o le taimi foi tatou te toe feiloa'i ai ma le aufaigaluega a le Atua ma nisi o o tatou aiga mai atunuu mamao, Niu Sila, Ausetalia, Amerika, Hawaii, Amerika Samoa, ma Fiti.

O le Fono Tele, o le vaituloto e lele iai le toloa e saili mea'ai ai ma inu ai - mea'ai ma vaiinu faale-agaga. Ae le faagaloina fo'i le ma'au ma le milomilosia ole afu tautua ma le fai mea lelei o aulotu i le tausiga o usugafono eseese.

O le tatou upu: e lele lava le toloa ae ma'au i le vai. O le Fono Tele, o le taimi tatou te gasolo ai i lo tatou laumua i Malua tatou te utuvai, ma tatou toe fo'i i aiga ma o tatou nuu ma a tatou faguvai ua tutumu. Aua e le na o tupe e loteina i le Fono Tele, ae laulauina ai foi taumafa faale-agaga e le Aufaigaluega a le Atua i lea aso ma lea aso. O le Fono Tele, o se Mafutaga lava Faale-Agaga a Uso ia Keriso.

'A 'e fo'i i lou aiga ma lau faguvai e le tumu ae oasa, o oe lava e mafua ai.

Afemata T. Apelu Aiavao
Faatonu o le Sulu Samoa

“Even the Son of Man did not come to be served, but to serve, and give His life a ransom for many”

Mark 10: 45

O le Alofa, o le Faasinomaga lea o le Ekalesia

Love, the Church Vision and Mission

E le sili lava le Alofa o se tasi i lenei Alofa, e tuuina atu e se tasi lona ola mo ana uo

Ou te faafetai tele atu i Lau Afioa i le Taitaifono a le Au Toeaina ma le Komiti a Tama ona o le avanoa ua tuuina mai ia te au, ou te saunia ai lenei pepa mo le mamalu o le Fono Tele. E ui lava ina lagona le vaivai ma le le atoatoa, ae taumafai pea, i le mea e oo iai le malosi.

O le a ma taumafai ma Epenesa, o lo'u to'alua, e faaoga lenei avanoa ma te faaso'a atu ai i le mamalu o le Ekalesia, i ni mea taua na mafai i le ma galuega faipaaga, ona mauaina ma iloa i le galuega faa-faifeau i tausaga e 42 na ma galulue ai i atunuu i fafo. Atonu e iai sona aoga i nisi o le Au Faigaluega ae tainane le Ekalesia,

Saunia e Popo Su'a F.T.

e maua ai foi se silafia i aga o le galuega i atunuu i fafo, i atugaluga ma ona faa-fitauli. Pau lava o lea, ou te faamalulu atu ai ona o le le lava o le taimi e mafai ai ona faamatala le tele o nisi mea taua o le ma galuega.

O le Manatu Autu:

“O LE ALOFA, O LE FAASINOMAGA LEA O LE EKALLESIA.”

Afai o le Atua o le alofa lava ia, e tusa ma le molimau a Ioane, e le fesiligia la le moni o le manatu, o le faasinomaga lava

breaking. Sa ta'ita'iina e le Afioa i le Taitaifono o le Ekalesia, Susuga Rev. Tavita Roma FT, ae saunia le tatalo e le Failautusi a le Komiti a le 'Au Toeaina, Susuga Kerisiano Soti FT.

E toatele nisi o le 'Au Toeaina ma Faifeau sa auai. O nisi o le Malo na auai e aofia ai le Sui o le Fono a Sui Tofia Afioa Tuimalealiifano Vaaleto'a Sualauvi II, Afioa i Minisita o le Kapeneta Fiamē Naomi Mataafa Faumuina II, Tolofuaivalelei Leiataua Falemoe, Tuisugaletaua Sofara Aveau, ma Le Mamea Ropati.

lea mo le Ekalesia Oloo manino lelei foi i lenei fetalaiga a Iesu ua avea nei ma Tusi Faitau Autu o leFono Tele: “E le sili lava le alofa o se tasi i lenei alofa,ia tuuina atu e se tasi lona ola mo ana uo.” O le alofa oloo ia finagalo iai, o le alofa lava o le Atua. O lea ua ia fofola le uiga o lona afio mai. O le ala ua ia savalia mo le laveaiina o tagata, o le ta'iala foi lea mo i latou o le a ia filifilia mo le faaauauina o le galuega:

“I lenei alofa?”

i. *O le Alofa, o le ala o le fesootaiga o tagata. Oloo faa'au le fetalaiga a Iesu i le alofa. O le alofa e mafua ai ona tuuina atu e le tagata lona ola mo ana uo. O le alofa foi e faama'itea le galuega o le faaolataga.*

ii. *E le na o se tasi se alofa, oloo ta'ua i le Tusi Paia. E pei o le eros oloo faatatau i le alofa faale-uo, o le **philia** o le alofa e fesoota'i ai faale-aiga atoa ma le isi foi tagata. O le **agape**, o le alofa pa'ia, e le faavaeina i ni lagona, a o le mea e tatau ona fai.*

O le galuega la o le faaolataga, e le'i faatupuina e ni lagona, ae o le mea e tatau ona fai. I le, o le galuega lea na mafua ai ona fesootai le tagata ma le Atua. O lea la ou te taofi, o upu ia a Iesu, “i lenei alofa”, e mautinoa lava oloo faatatau, o le Atua e ona le alofa. O ia foi na fetalai, “Aua ua faapea lava ona alofa mai o le Atua i le lalolagi, ua ia foaiina mai ai lona atalii e toatasi faaauau itulau e sosoo ai

Suaina le Eleele mo le Iupeli Fou

breaking) o le faailoga lea o le a amata se galuega. Ma o le amataga lava lea o le fausiaina o le Iupeli fou e sui ai le malumalu tuai ua tuuina i lalo ona ua iai ni mea ua faaletonu, ma ua laitiiti foi mo sauniga a le Ekalesia pe a potopoto i lo tatou laumua i Malua.

O se sauniga puupuu i le Aso Lulu, 2 Aperila 2014 na faia ai lava i le mea na suaina, - *ground*

O le Alofa, o le Faasinomaga lea o le Ekalesia

Love, the Church Vision and Mission

E le sili lava le Alofa o se tasi i lenei Alofa, e tuuina atu e se tasi lona ola mo ana uo

*ina ia le fano se tasi e faatuatua ia te ia, a ia maua e ia le ola faavavau.” (Ioane 3:16), e mautinoa ai, o le alofa e pei ona ia ta’ua, o le alofa lava o le Atua. iii. O le alofa sili. O le alofa sili foi e pei ona fetalai iai Iesu. O le alofa na te mafai ona faaleleia ma faafesoota’i le tagata ma le Atua.. O le alofa e ave uma. E na o le Atua lava na foa’i lona Alo o le togiola mo tagata uma. O le molimau a Ioane: **O le Atua o le alofa lava ia.** (1 Ioane 4:8). Afai e mafai ona liliu le manatu lea o Ioane ma faapea ai, o le Alofa o le Atua lava ia. O lona uiga, o le Atua lava ua ia tuua lona nofoalii, ua mau foi o ia faatasi ma tagata ia faaolaina i latou. E le gata la o le Atua na alofa, a o ia lava o le alofa. O le alofa o le ata vaaia lea o le Atua.*

O le faata’otoga lea e Iesu o le lu’i mo i latou ua filifilia e faaauau le galuega o le faaolataga.

Oloo faaaogaina e Iesu le uo e faamatala ai le fesoota’iga ma le tagata agasala. O le maualuga lea ua faatulaga iai e Iesu le tagata leaga ma le agasala, e fai ma uo. **“O a’u uo outou, pe afai tou te faia mea uma lava ou te fai atu ai ia te outou.” “Ou te le toe ta’ua outou o auauna,.....a ua ou ta’ua outou o uo aua ua ou faailoa atu ia te outou mea uma na ou faalogo ai i lo’u Tama.** (Ioane 15: 14,15). O le foaiina atu e Iesu o lona soifua mo ana uo, o se mea lea e tupu ona o le alofa. O le fua

lea ua siitia iai le tagata e fesootai ai ma le Atua ua afio ifo, ona fai ai lea o le faiga pa’aga faale-uo.

O se auiliiliga lea o lea mataupu, e ta’ita’iina ai i tatou i le mea oloo finagalo ai le Ao o le Ekalesia ma tatou mautinoa ai:

O LE ALOFA, O LE FAASINOMAGA LEA MO LE EKALEZIA

O le alofa, o le malosi e tini ai i le faamoemoe.

Na valaauina i ma’ua ma lo’u to’alua e le Aulotu i Porirua i le tausaga 1972 e oo i le 1979, ona toe galulue lea i le Aulotu i Ketesemane i Porirua lava i le 1980 e oo mai i le aso nei. O lea ua faliu le la i lona tauafiafi, ua tuta foi i fanua lo ma sa ma lo’u to’alua ua a’e foi le faatamasoaliiga i le galuega faafaifeau ina ua atoa le 42 tausaga o la ma auaunaga i le Atua e ala i le Ekalesia Faapotopotoga Kerisiano i Samoa ma atunuu i fafo. Se ala ina a faigata, matuitui ma le tiga. A’e mauga, ifo vanu. Ua le pei o Mose na ona tu ma vaai i le nuu pa’ia, ae le’i taunuu, aua o lea ua tini le ma faigamalaga e tusa ma le faamoemoe. Mai fea lea malosi? O le alofa o le Atua. E moni lava le fetalaiga a lo tatou Alii ua fai nei ma ta’iala o lenei Fono Tele: **“E le sili lava le alofa o se tasi i lenei alofa, ia tuuina atu e se tasi lona ola mo ana uo.”**

O lea ou te talitonu ai lava, o lenei fetalaiga a Iesu, o le

manulauti lea o le tatou auaunaga i le Atua i taimi uma.

I lea manatu, ua ma tutu ai nei ma tepa i tua i lenei 42 tausaga i le ala umi na ma savalia i le galuega faafaifeau, ona ma iloa ai lea o nisi o mea e faatupu manatu mo le malaga aga’i i luma a le Ekalesia. O lea la ua maua lenei avanoa e faaleo ai se lagona ina ia avea ai: **O SE TUUALALO MO LE EKALEZIA I LE AGA’I ATU MO LE LUMANA’I.**

1. Ia faamalosi pea le galuega faamisionare faalotoifale a le Ekalesia i atunuu i fafo.

i(a) O le faaauauina o le galuega faalautele a le Ekalesia faalotoifale, e le itiiti lava lona taua. Aua pe afai lava o le alofa o le faasinomaga lea ua uma ona faata’oto e le Ao o le Ekalesia, e le mafai foi la ona taofia le faamalosi pea o le galuega faalaua’itele a le Ekalesia. Oloo tele pea le saito e seleseleina.

E tele le saito e seleseleina, a o le aufaigaluega e toaititi ia; o lea ia outou ‘ai’oi atu ai i le Alii e ona le saito e seleseleina, ina ia ‘a’auina mai e ia ni e galulue i lana saito e seleseleina.” (Mataio 9:37)

i(e) Ua malosi le Ekalesia i fafo ma ua alagatau foi le taimi ua faama’ite ai le galuega faamisionare, aua o taimi ua mavae *faaauau itulau e sosoo ai*

MATINI LUTERU

1483 - 1546

O le Auupega o le Toe Fuata'i

O le a le Mafuaaga o le Vevesi

O autu o mataupu na tetee iai Matini Luteru, mea ia na ia faapipii i le faitotoa o le malumalu i Uitenipeka, o le: (i) o le tologiina o agasala ina ia faamagaloina ai; (ii) o lona le talia lea o le pule a le pope i pulekatorio, le nofoaga lea fai mai latou e o iai agaga o e ua oti e faatali ai se'i tologiina a latou agasala; (iii) o lona manatu mamafa i le manuia o le tagata agasala.

Na matua tetee Matini Luteru i le talitonuga faapea e mafai e

le pope ona faaitiitia le faasalaga o le tagata o faatalitali i pulekatorio. Na ia fesiligia foi le iai lea o se faaputuputuga o ni mea lelei na faia e tagata pa'ia, (saints). O le mea moni lava, na o Iesu. A o mea na faia e Iesu na faia ma lona finagalo malie e aunoa ma le mana'omia ai o le pule a le pope e noatia ai pe tatala ai foi. Na matua faitio lava o ia i le faatauina atu o togisala (indulgences). O lona talitonuga ua suia e lea mea le salamo faamaoni ma le agaalofo mai le loto o le tagata. E faaopopo atu i lea mea, na manatu o ia o le faatauina atu o

togisala, ua avea ma mea e manatu ai tagata ua sao latou ma oo ai ina faatalale ia latou amio e fai i aso fai soo.

Na matua 'eli i lalo e Matini i le faavae o le Ekalesia le mea moni ina ua ia fesiligia pe o le a lea mea o pulekatorio, poo le nofoaga mo agaga o tagata ua oti e faatalitali ai le tologiina o a latou agasala e o latou aiga oloo ola, faato'a sao ai i le manuia i le lagi. O le manatu o Matini, o le togisala o se mea e faalavelave ma le amana'ia ai le faaolataga. E manatu o ia e matua malaia lava i latou e manatu o lisiti o a latou togisala o se faamaoniga lea o lo latou faaolataga.

E tatau ona faalototeleina Kerisiano latou te tauaveina le satauro. O le ua papatisoina ia Keriso ia pei o se mamoe ua *faaauau itulau e sosoo ai*

O le Alofa, o le Faasinomaga lea o le Ekalesia Love, the Church Vision and Mission

sa na ona faatalitali le Ekalesia a o tuputupu pea le galuega e ala ia i latou oloo autovaa mai i Niu Sila ma aumau ai. Manatua o i latou nei na o mai, e saili manuia, ae le'i saunia i latou mo lea faamoemoe. E eseese mafuaaga na una'iina ai i latou e faavae aulotu. Pe oo ina see ese le Ekalesia ma lona faasinomaga, ona avea lea ma faapogai i nisi faaaitiitia ogaoga oloo alia'e pea i lea taimi ma lea taimi.

i(i) O o tatou tagata oloo autovaa mai i atunuu i fafo, e salalau solo, toe alaala lava le tagata ia i lona fale. E leai foi se faasinoga i se lotu e lotu ai. A o le galuega faamisionare na te aoaoina mai tagata e le o lolotu. O le a faigofie foi i le vaiga a le Toeaina ma le Pulega i le nofoaga tonu e tatau ona atia'e ai se aulotu.

2. Ia avea pea le alofa o le Atua fai vavega ma faasinomaga o le galuega a le Ekalesia.

E faaalua i le olaga o tagata le alofa fai vavega o le Atua.

O se toe tepa i tua i le amataga o le Ekalesia, e ofo le loto i le atina'eina o le lotu. O le tupulaga talavou i le va o 25 i le 35 tausaga le matutua, o i latou ia sa feagai ma le atiinaeina o le galuega. O le atunuu o papalagi, e le masani ai o latou tagata, e le lelei ni a latou nanu. A o mea na latou mafai ona atia'e mo le lotu, e ofoofogia. O lo latou talitonuga o le alofa o le Atua lea ua latou'ae'ae ai i nei faamanuiaga, i avanoa ua latou maua ai le tamaoiga. O le latou tali lea i lona alofa, oloo faaalua i lo latou ola ua foai mo le Atua ma faatino i ala ua latou filifilia e pei o le faatauina o fanua, o le fauina

o falesa, hall ma fale o faifeau, o lo latou ola fai taulaga, atoa ai foi ma le tausiga o a latou faifeau.

O le fatu na toto i o latou loto i Samoa, lea ua o mai ma i latou i atunuu ese ma faaola ai. E manatua pea foi, i ia ona po, o le Tusi Paia lava, o le oso lea e tuu e matua poo le faifeau i le o le a malaga i Niu Sila ma le apoapoa'iga e faapea: *O le Tusi Paia lea o le tapasa o lou olaga i lou iai i atunuu ese.*

E masani ona ma faalogo ia latou tala e faapea: O mea ia e vaai iai o matou mata o fai e o matou matua, pe a talanoa i le tausiga o le faifeau, i faiga taulaga ma galuega faalelotu. O le isi lea malosi oloo u'una'iina le latou tautua, o lo latou lolofa i o latou matua; o le faata'ita'i i mea lelei oloo fai e o latou matua.

O le fetalaiga a Iesu ina o le a taape le motu o tagata ina ua mavae aso e tolu o nonofo pea e faalogo i *faaauau itulau e 7*

MATINI LUTERU

1483 - 1546

O le Auupega o le Toe Fuata'i

mai le itulau e 5

saunia e fasi. O le taua o Keriso e matua sili ona malosi pe a feagai ai ma satauro i lo le aveesea o le agasala.

A o faaauau ana su'esu'ega i le Tusi Paia, na te le'i iloa i lea vai taimi, o mataupu e Iva Sefulu ma le Lima na ia faapipii i le faitotoa o le falesa, ua faaliliuina mai le gagana Latina i le gagana Siamani, ma ua faasalalau atu i tagata lautele faapea ai ma e maufofi o le lotu. O ni mataupu na tiga ai loto o e maufofi o le lotu, peita'i ua faapupulaina ai mata o tagata lautele ma latou maua ai se malamalama'aga. Ua avea lea ma mea e matua popole ai le fili lea e pulea tagata i lo latou faaaogaina o le le malamalama poo le valelea o tagata.

Sa nofo Matini i lona ofisa e aunoa ma lona iloa le mea moni, ua amata tuputupua'e se fou tele. O le mea moni lava, ua fia selau tausaga o tuputupua'e lea tetee. Na amata mai ia Ioane Uikilifi ma lona faaliliuina o le Tusi Paia mo tagata lautele. Faasolo atu ai ia Ioane Hasi, lea na amata susu'ea le pogisa o Tausaga Pogisa (Dark Ages) i ni faaaliga taua e pei o ia na faia e Matini. A o Ioane Uikilifi ma Ioane Hasi na maliliu e aunoa ma lo la silasila i ni fua o lo la tautiga, ae na vaai iai Matini Luteru. Ma o Matini na ia faasooina le lalolagi i lea malamalama. Fai mai talatuu, a o susunuina Hasi i le afi i tuua'iga sese na faia e le lotu,

ae ia valo'ia le tula'i mai o Matini i se aso. Fai mai, a o talali le afi o susunuina ai o ia, ae ia valaau mai i totonu o le afi 'a'asa i ta'ita'i o le lotu, toe selau tausaga ae tula'i mai le tagata latou te le mafai ona fasiotia.

E le'i ta'ua e Hasi le igoa o Matini, ae na malamalama tagata o Matini lea na faatatau iai upu a Hasi. E te'a tausaga e selau talu ona maliu Hasi, ae tula'i mai loa Matini, ma e ui lava e tele ni taumafaiga ina ia fasiotia Matini, ae le'i taunuu. Ma ua aafia uma lava tatou i le galuega tele na faia e Matini i le tusa o le 500 tausaga talu ai.

Na tu'imau e Matini ona talitonuga i le faitotoa o le falesa, ina ia faitau ai tagata, ma maua mai ai ni o latou manatu. Na tufatufaina foi i le meli nisi kopi i tagata na mana'o Matini latou te faitau iai.

Ua sosolo atu nei i Siamani e pei o le afi mumu tala o talitonuga o Matini na tu'itu'i i le faitotoa o le falesa, ma e na viia e tagata le loto tele o Matini e fai lea mea. Na tau popole Matini ona o le toatele o tagata ua latou lagolagoina ona manatu, peitai na matua fiafia tagata ona ua latou maua se malamalama'aga i mataupu sa latou le malamalama ai tau i le Ekalesia. Na faapopoleina foi le pulega o le Ekalesia i Roma, ma oo ai ina sauni se toe su'esu'ega o Matini. E fa tausaga e le'i faataunuaina lava lea su'esu'ega. Ma o se avanoa lea

na faaaogaina e Matini e faamautuina ai e ia le itu faaleagaga o ona talitonuga. Ina ua su'esu'eina o ia na ia fai ane ai, "o lo'u agaga ua pu'eina e le Upu a le Atua."

E pei ona faaalua muamua, o le faaavanoaina o Matini e le Ekalesia Katoliko na te su'esu'e le Tusi Paia, o se mea matua sese lea mo latou. Aua ua avea lea ma mea e faatuputeleina ai le malosi o talitonuga o Matini, ma ia fesiligia ai pea lava pea mea o faia e le lotu a le pope.

E le'i umi ae ia faalauiloa faapea, na o le Tusi Paia oloo iai le pule, ae le o le pope, aua o le pope ma ana komiti, e iai o latou sese. Na ia teena foi le pule a le pope i pulekatolio, ma ia teena atoa le iai o lea mea e ta'ua o pulekatolio.

Ua amata faalala mai nei le ono faate'aina (excommunication) o Matini ma le Ekalesia, ae le'i fefe ai. Mulimuli ane ina ua maumaututu lona malamalama i le Tusi Paia, faapea ma lona va ma lona Atua, na ia talitonu ai, tusa lava pe motusia lona auai i le Ekalesia, na talitonu o ia e leai se mea e mafai ona faate'a'eseina mai o ia ma le alofa o le Atua. E oo lava i le faasalaina o ia i le oti e le'i popole iai. Ua sauni o ia e oti ai i ona talitonuga. Ua ia faasilasilaina foi e faapea, ia aua le usita'ia faatonuga a epikopo i tagata e totogi atu tupe mo agasala, a le totogina ua faate'a ma le Ekalesia. Ua lagona nei e Matini e faapea o le uaina fou lea ua sosolo i ona tino, e le toe mafai ona toe utuina i fagupa'u tuai. Ma e le o toe umi ni aso, ae le toe avea o ia o se tasi o le Ekalesia Katoliko Roma.

O le Alofa, o le Faasinomaga lea o le Ekalesia

Love, the Church Vision and Mission

mai le itulau e 5

ana aoaoga ma saili i ana faamalologa: **“Ou te le mafai ona tuuina atu ia te i latou e o matelaina, nei latou lailoa i le ala”** (Mataio 15:32). Na ia faia ai le vavega i potoi areto ma nai i’a lauiti e fafagaina ai le motu o tagata ina a toatele! O le tapenaga lea a le Ekalesia i Samoa, ma aiga, na saunia ai i latou a o aga atu i nuu ese. O le alofa lava fai vavega o le Atua ua lava lea mo le aga’i pea i luma.

Ua matutua nai tagata na latou toto le fatu o le alofa, ua amata ona soloa’i ane a latou fanau e tau’ave le avega. Ua ese la latou faauigaina ma le latou vaai i le Ekalesia ma lana galuega faaauau.

O le alofa fai vavega o le Atua, o le taula mo le Faifeau ma lona To’alua.

O le avega o le alofa ma faasinomaga, o le malosi lava lea na te ta’ialaina le galuega a le Faifeau ma lona To’alua.

O afioga lava nei a Iesu e ta’iala ai le avega ma faifeau i lo ma ola galulue.

1. - “.....ona tuu atu lea e ia o le pule i agaga leaga, e tutuli ai temoni, ma faamalolo ai ma’i tiga uma.” (Mataio 10:1;
2. - “Ia outou nonofo i le aai, seia faaofuina outou i le mana mai luga,” (Luka 24:49);
3. - “Ou te ‘auina atu foi outou e pei o mamoe i le va o luko fe’ai, o lenei, ia outou atamamai e pei o

gata, a ia fifilemu e pei o lupe.”

O faigata ma lu’itau o le galuega, e leai se faafia malosi iai. O le mea lea e taua ai lava le manatua pea e le faifeau ma le to’alua, le tapenaina o i latou e le Matai o le galuega. Ua uma ona faaofuina i le mana, ma le malosi e fai ai vavega o le alofa mo le faaolaina o tagata. O le potu ma le agaga to’amalie, o meaalofa ia a le Matai o le galuega e faaa’upegaina ai lana aufaigaluega. O faafitauli e tula’i mai i le galuega, o se isi lea ala taua e faatonu ai ma faapoto ai foi i le faatuatua.

Oloo iai pea le malosi o le tatou aganuu i totonu o pulega faale-Ekalesia. **Ia mataala pea le aufaigaluega ina ia mautinoa oloo ta’ita’iina le Ekalesia e le alofa o le Atua ae le o le aganuu.** Oloo tele pea le feteena’iga o mataupu faale-Ekalesia, ona o le malosi foi o le faale-aganuu. O le

faaauau itulaue 8

O le Mafuaaga o le pese: “At Calvary” (“I KALEVARIO”)

mai le itulau muamua

faalogo uma lava iai, lea e tumutumumu iai le afe ma afe tagata maimoa i tausaga uma e fia oo iai ma matamata ai.

A o le uiga moni o mea na tutupu i lenei fasi eleele i le tusa o le luaafe tausaga talu ai, e le ma iloa e le toatele o tagata oloo asiasi atu iai.

Ua faatepa o tatou mafaufau e lenei pese: “I Kalevario”, i le alofa anoanoa’i o Keriso mo i tatou na ia faatinoina i lona malii i luga o le satauro. Ua viiviiia ma faaneeneina e lenei pese le manumalo o lo tatou Alii i le agasala ma le oti, ma maua

mai ai le faaolataga mo tagata uma latou te talitonu ma faatuatua ia te ia o lo tatou Puluvaaga ma le Alii. O le vanu tele sa iai i lo tatou va ma lo tatou Atua ona o le agasala, ua mae’a ona fauina ai e Keriso le “alalaupapa” i lona lava tagata, o le taulaga pa’ia lea mo le faamagaloina o agasala, na ia osia i Kalevario.

O le na ia tusia le pese o Viliamu Neueli (William Newell), o se fai evagelia logologoa, faia’oga o le Tusi Paia, ma o le pule lagolago o le Moody Bible Institute.

A o aga’i atu o ia i se isi aso e

fai lana a’oga, na mafaufau o ia i puapuaga o Keriso i Kalevario ma le uiga o ia mea mo ia lava o se tagata ua leiloa i le agasala. Na mamafa lava lona mafaufau i ia puapuaga o le Alii, i lona mafaufau, o lea na afe ai loa i se potu a’oga o avanoa, ua nofo ai ma amata tusi i lalo upu o lenei pese. I se taimi mulimuli ane ae feiloai atu o ia i se tasi o ana uo faiaoga, o le pule i le a’oga musika i le a’oga, o Tanielu Touna (Daniel Towner), ma faaali iai upu o le pese ua uma ona ia tusia, ma fai iai pe mafai ona ia faanotaina ana upu i se fati manaia. Na o le tasi pe lua itula na alu ai Tanielu Touna ae toe sau ua uma ona tusia nota o le pese. Ona la pepese faatasi ai lea i le pese: “I Kalevario”.

faaauau itulau e sosoo ai

O le Alofa, o le Faasinomaga lea o le Ekalesia

Love, the Church Vision and Mission

alofa lo tatou faasinomaga, ae le o le faaaloalo.

3. **Ia 'aua lava nei galo, e tasi le Faavae o le Ekalesia, o Iesu Keriso lea.**

Tofiga Faata'ita'i

O le Faavae o le Ekalesia, oloo taoto ai le atamai i le ta'ialaina o le galuega faaola. O lona Faavae i le aoao tetele i le taitaiga a le Fono Tele, o le ta'ita'iga o Matagaluega e le 'Au Toeaina, o le taitaiga o Pulega e le Toeaina, ma le taitaiga o aulotu e le faifeau, o le malosi lea **ia faaalua ai** le mana o le Atua oloo moomia e tagata i le faatamao' aigaina o le soifua faale-agaga o le Ekalesia.

Pe afai o le alofa le faasinomaga o le tatou auaunaga, o lona uiga la, 'o 'i tatou lava o auauna. O Iesu

lava e ona le fetalaiga: **“Ua le filifilia a'u e outou, a ua filifilia outou e a'u.** (Ioane 15:16) **Ia outou manatua le upu na ou fai atu ai ia te outou. E le sili le auauna i lona alii.** (Ioane 15:20). Ona mafai ai lea ona tatou manatua, o i tatou lava o auauna ae le o le alii. O le Toeaina o le auauna a le Matagaluega ma le Pulega tainane le Ekalesia Aoao, o le faifeau o le auauna a le aulotu. **“...pe a uma ona fai o mea uma na poloaina atu ia te outou, tou te fai ane, o auauna le aoga i matou nei, aua o mea e tatau ona matou fai.**

O le aganuu ma le Ekalesia i Niu Sila

O le Ekalesia i atunuu i fafo, e leai se pulega faale-nuu e aafia ai pulega faale-Ekalesia peitai, oloo

tele se aafiaga o le aganuu i le ta'ita'iga i totonu o aulotu, Pulega ma Matagaluega tainane le Ekalesia Aoao. Talu ai ona e le o se nuu e tasi, a o matai oloo i totonu o le aulotu, e eseese nuu e o mai ai, o lona uiga, o le ta'ita'iga a le faifeau i lalo o le ta'ita'iga a le Faavae e mafai ona maopopo ai manatu o tagata. **Ia ave a pea le aganuu o le auauna o le alofa, ae le o le pule o le alofa.**

4. **O le faaitulagi i atunuu i fafo, e pei ona fautuaina e le Komisi Suesue, o se ta'iala lelei lea, e faatino ai galuega o le alofa a le Ekalesia.**

O le tausaga e 2012 na faamanatuina ai le 50 tausaga o le Ekalesia i Niu Sila. O lea sauniga faamanatu, na manino ai le malosi ma le uluola o le Ekalesia. E 30,000 ona tagata lotu, e 73 aulotu ma ana meatotino e silia ile \$100 miliona lona tau faatatau ua iai nei. O le malosi lea ua tatau ona faaaoga, ae le o le faamoe *faaaauu itulau e sosoo ai*

mai le itulau e 7

O le Mafuaaga o le pese: “At Calvary” (“I KALEVARIO”)

Years I spent in vanity and pride, caring not my Lord was crucified, knowing not it was for me He died in Calvary.

By God's Word at last my sin I learned-then I trembled at the law I'd spurned, till my guilty soul imploring turned to Calvary.

Now I've given to Jesus ev'rything; now I gladly own Him as my King, now my raptured soul can only sing of Calvary.

O the love that drew salvation's plan! O the grace that bro't it down to man! O the mighty gulf that God did span at Calvary!

Chorus: Mercy there was great, and grace was free, pardon there was multiplied to me; There my burdened soul found liberty-at Calvary.

It's Our Turn

We have a greater opportunity today than Paul ever had. I imagine if Paul can look down here, he is “champing at the bit”. How he would like to be on television! How he would like to have a radio hour! How he would like to get on a plane and go from Corinth to Rome. How he would like to use some of the facilities we have for saving the lost. Paul isn't here, but we are! God is depending on us.

Billy Graham

O le Alofa, o le Faasinomaga lea o le Ekalesia

Love, the Church Vision and Mission

faaleaoga.

Oloo feagai foi le Ekalesia ma le tele o faafitauli, e pei o faafitauli tau fale, o le soifua maloloina saogalemua, o aiga ua le gafatia le tulaga o le tamaoaiga, o fanau ma o latou faafitauli, o le 'ava malosi ma fualaau faasaina, o le sauaina o tina ma fanau etc. O ia faafitauli ua na o se galuega fai faatasi, e mafai ona maua ai se malosi e tali ai ni ona fofo.

O nisi nei o mea taua e taua ai le Faaitulagi.

a. - O faamanuiaga a le Atua i le ola tautua o tagata o le Ekalesia i atunuu i fafo, o le potu ma le atamai ua foaiina ia latou fanau. Ia tatala le avanoa mo fanau e faaaoga lo latou tomai mo le faamama avega i o latou matua ua matutua lava o tau faatupe i o latou totogi ma a latou penefiti le tautuaina o le Ekalesia. O le taimi nei, oloo tuli lava le moa a le faifeau ia (tulou) i le taumafai e saili i faamanuiaga ia. Peitai o se taumafaiga tuufaatasi e aofia ai Matagaluega uma, o le a tosina gofie iai le malo, ma faigofie ai ala o feutaga'iga. **Ua oo i ona po, ua le toe tatau ai ona faalagolago tasi i le amo a tagata lotu.**

e. - I Niu Sila, ua mafai e le Ekalesia ona feutaga'i ma le malo i le faia o ni Aoga Tulagalua ma Kolisi. Faapea foi ma ni nofoaga mo tagata matutua, atoa foi ma le tele o isi auaunaga. O le taimi nei, oloo ua aga'i le malo i le fai paaga ma Ekalesia i mea tau Pasefika latou te lagolagoina ai ma faatupeina auaunaga 'ese'ese oloo faatino e Ekalesia i mataupu tau a'oga ma le soifua lautele o tagata, ae pulea lava e le Ekalesia mea uma. O Aoga Amata e 15 oloo

faagaioia nei e aulotu a le EFKS, oloo totogiina uma e le malo le fauina o faleaoga toe faatupe uma le faatinoina o le aoga, ae pulea e le aulotu mea uma. Pe a ausia le lima tausaga o faia pea le a'oga, ona avega ai lea o ia meatotino na fauina i tupe a le malo, ma meatotino a le aulotu e ona le aoga. O lea la faiga, e mafai ona fesoasoani ai le Faaitulagi i le Ekalesia Aoa o le faatupuina o lona tamaoaiga tau aseta i Niu Sila.

5. O le faaaogaina o le Gagana Samoa i Tapua'iga ma le A'oga Aso Sa

O se mataupu taua tele lea oloo tula'i mai i lenei vaitau i le Ekalesia i fafo, o le faaaogaina lea o le Gagana Samoa ma gagana autu i tapua'iga ma le a'oa'oina o le fanau. O le isi lea malosi o le tosina mai o tagata i le EFKS, ma na taofia foi o tatou tagata i le lotu ona o le Gagana Samoa. Ma o le miti lava lea a le Ekalesia i le amataga na mafua ai ona tupu le Ekalesia i Niu Sila. O le gagana ma lana aganuu, o meaalofa a le Atua i o tatou tagata. Aua o lo tatou lea faasinomaga i atunuu ese. Peita'i e le o aunoa ma faafitauli oloo tulai mai ai, e le tatau ai i le Ekalesia ona laaloa ai lana silasila.

Ia silasila le Ekalesia mo le fo'ia o faafitauli oloo tulai mai ai ina ia aua lava nei faavaivaia la tatou mau i la tatou gagana ma le aganuu, o a tatou measina, e taua i le olaga o le Ekalesia. O se faiga

paaga foi ma le malo, o se fesoasoani malosi lava lea.

Manatu Faaiu:

O le matou galuega vaavaalua ma le matou aulotu, e le mafai ona faagaloina lona taua. O le tele o a'oa'oga taua na ma mauaina i le galuega faapaaga ma i latou. O le alofa ma le agalelei mo i maua ma le fanau. Ia faafetaia pea le Atua i mea na latou faia mo i matou. O le folauga na fetia'i pea ma matagi vale o le olaga galue i ia tausaga e tele, oloo silafia e le Atua. E leai se atoatoa oi le auauna.

Le Atua e, faamagalalo mai i lo ma vaivai.

E le mafai foi ona faagaloina i la ma galuega faafaifeau, le aafiaga o la ma fanau i totonu o le galuega. O le tele o le latou sao i la ma galuega. E ola faatatau i le olaga faafaifeau. E galulue foi e tautua la ma galuega i le mea ua latou mafaia ona fai. E mafatia foi i o ma mafatiaga.

E mautinoa foi i la matou auaunaga, e tumu i sese ma faaletonu. O ni amioga le tautamalii sa faaalua i le ola galulue, o so matou sese lava lea i le Ekalesia a Keriso. Le Atua e, faamagalalo i sese sa fai e i ma'ua, atoa foi ma le fanau.

Le Alii e, e te tuuina atu nei lau auauna, ia alu ma le manuia, pei o lau afioga; aua ua iloa e o'u mata lau faaolataga ua e saunia i luma o nuu uma lava; o le malamalama e faamalamalama a'i nuuese, ma le mamalu o lou nuu o Isaraelu.” (Luka 2: 29,32)

Soifua ma ia manuia le Fono Tele, 2014.

Popo Su'a

Toeaina Penisione (faaolioli)

“O le alofa lo tatou faasinomaga ae le o le faaaloalo.”

“Ia ta'ita'iina le Ekalesia e le alofa o le Atua, ae le o le aganuu.”

Rev. Popo Su'a F.T.

Sauniga mo Faifeau Penisione Fono Tele - Malua

O i latou ua penisione i lenei tausaga

POPO SU'A F.T.

Niu Sila i Saute

SENETENARI IUPELI F.T.

Niu Sila i Saute

FAATAUSAU ONESEMO F.S. Apia i Sasae

Suafa o A'oa'o Faau'u mo le Tofi Faife'au Samoa - Fono Tele 2014

SUAFA	FALETUA	MATAGALUEGA
Reupena S. Nofoaiga	Vaipou	Faleata
Sauleone Tanoi	Lipale	Faleata
Eric Mulitalo	Amata	Aana
Tupou Tanielu	Lisa	Aana
Atapana Tupuola	Etevised	Falealili Sisifo
Malotau Lafolafoga	Sina	Falealili Sisifo
Tanuri Pesaeli	Sanaima	L.L. Aleipata
Aperaamo Tufuga	Ann	Faasaleleaga
Setefano Logovii	Maria	Faasaleleaga
Lealao Polutea	Litia	Ituotane
John An Honi (misionare)	Fesu'ea'i	Niu Sila i Saute
Apineru Fasavalu	Winona	Kolisi Malua

A Little Girl's Prayer:

**One night a little girl surprised her mother, when she concluded her prayer for her family and friends by adding,
“And now, God, what can I do for You?”**

A Page for Youth
ITULAU MO TUPULAGA TALAVOU

DEATH AND DAWN

O le Oti ma le Tafaoata

mai le itulau muamua

“Ia tuu i se potu ta’ito’atasi,” o le tali lea a le foma’i tipitipi ma talai ona ofu talaloa.

“Ua tutumu foi, vagana le potu lea e iai le toeaina o Mekiloi e maua ai sina avanoa. La e faamanava i le okesone. E le taumate na te le aulia taeao. Ua uma ona logoina lona aiga.” o le tali lea a le teine tausima’i.

“Ia ua lelei. E le afaina le tuu ai o le tama lea aua e le ala i le po atoa lenei.”

Pe afai e toe ala, o mafaufauga ia o le teine tausima’i ma vaavaai i le tama. O le ituaiga tama talavou lava lenei e le manumanu i le ola; ‘ena’ena le lauulu, tinoiti, umi pa’e’e. O le ituaiga tama lava lenei e lavevea soo i taavale latou te aveina, televave ma taso’a pou moli ma papovi, ma totofu i autu, ma fetau ma isi taavale saosaoa.

E leai se isi na te iloa poo ai lea tama, sefuluono, sefulufitu, pe sefuluvalu ona tausaga. O le taavale na alu ai o le taavale na gaioi. E aumai i le falema’i e le iloa se mea, a o tafetoto lona tino i ona manu’a.

“Tuu i le potu 23,” o le faatonuga lea a le teine tausima’i. Na tullei atu le fatataavale o iai le tama e tama faigaluega, ae mulimuli atu ai le tausima’i. E leai ma se pisa i le potu 23, vagana le pa’o o le okesene, ma si tama’i moli e mafai ai e tausima’i ona feoa’i i le potu pe a tape moli. Na iloa atu e le tausima’i le toeaina o Mekiloi.

“Faaeteete ona lote o le ulu o le tama,” o le tausima’i lea. Ae tali le tama faigaluega, “Fai mai e matua malepe lava le taavale.” Na sii e tamaloloe e to’alua le tama i luga o le moega o le falema’i, ma

faata’oto lelei i luga o le moega. “E iai se isi mea Misi Matini?” “Leai, faafetai lava,” o le tali lea a le teine tausima’i.

Oloo manava le tama ae le manava lelei. Na fua le tata o lona fatu, e tau faaletonu, e le taumate e mafua mai i le faalavelave o le lavea o le taavale. Na tatagi le telefoni ona alu lea o le teine tausima’i ua tali.

“Talofa!”

“Misi Matini?” O le to’alua o le toeaina o Mekiloi lea ua telefoni mai. “E le mafai ona ou moe. Lo matou aiga uma. Se’i vaai atu lava.....”

Ua tuu i lalo le telefoni. Ua tau feooloo mai le manava a le tama. A o Mekiloi ua na o le faasasa’o. Ua tau masalosalo le tausima’i, poo manava ea le toeaina pe leai? Na tago i le lima poo tata le fatu. E leai! Ua toe tamo’e i le telefoni.

“Misi Mekiloi, e sili ona e faavave mai i le falema’i.”

“O le a ou oso atu nei lava.”

Ua tago le teine tausima’i ua telefoni le foma’i tiute. “Foma’i, o lea ua uma ona ou telefoni i le aiga o Mekiloi.”

“Oi, e a? Ua oti?”

“.....te iloa, ai ua.....”

“O le a ou alu atu. Sauni nila ma vailaau.”

“Ua lelei.”

E le’i toe gaioi lava Mekiloi. Ae faapea foi ma le tama. Tasi o le mea, o le la lava e manava le tama.

Ua tago le tausima’i ua faatele teisi le okesene, ki le moli i tafatafa o le moega o le toeaina, ma aumai isi nofoa e lua i tafatafa o le moega.

E tasi lava le mea na talosaga ai Misi Mekiloi i le aso ua mavae, a lata ina uma le ola o lona

to’alua, ta’u atu ona faanatinati mai loa lea.

Na fai le faatonuga a le foma’i i le teine tausima’i, “E te vaai atu loa ua lata ina oti, telefoni loa le aiga, aemaise le to’alua o Mekiloi.” Na fesili le foma’i, “O ai le isi ma’i le la?”

“Na oso lana taavale i le autu. Sefuluvalu pe a ona tausaga. Ua laki le ola. A o le taavale gaioi.”

Ua tu’itu’i mai le faitoto’a. “E mafai ona ou alu atu?” O le fesili lea a le loomatua o Misi Mekiloi lea ua tu mai i le faitoto’a.

“Oi, sau loa. Nofo i le nofoa lea. O lea o le a fai lona tui e tau faaala ai, se’i lua talanoa.” O le foma’i lea ua sauni le tui o le toeaina.

Ua ulufale uma mai i totonu o le potu le aiga o le toeaina. O le loomatua, o le atalii - umi, ma ona foliga faanoanoa; o lona to’alua matua aulelei lava, laulu enaena, oloo tagi i lona solosolo, ma le afafine, aulelei ma talavou, e soo i lona tama. O le tama o Siaosi, o lona tuafafine o Maria, ma le to’alua o Siaosi o Ruta. Na malilie uma lava e fai le ta’otoga o Mekiloi, ma na faaopoopo ai isi masina e tolu o lona ola.

Fesili Siaosi, “Ae faapefea le tama le la?”

Tali le tausima’i, “Aua e te popole iai. Na te le o iloa se mea. Ua leai se potu o avanoa ona aumai ai lea i le potu lenei e tele, e toalua ma lou tama.”

Na faailoa atu i le loomatua e le foma’i, e na o le afa itulau lo latou taimi.

“Faafetai tele lava foma’i. Ua lelei.” Na ulufafo le foma’i, soso uma mai loa le fanau i tafatafa o le moega o le toeaina o Mekiloi. Ona musumusumu atu loa lea o le loomatua, “O lea ua matou iinei uma, i ou tafatafa. Na o mai Siaosi ma lona to’alua o Ruta matou fai’aiga. O le sitiu mamoe lea e te fiafia lava iai. Papa, na kuka ma le matou pai. E te manatua le pai muamua lava na ou kukaina ina ua
faaauau itulau e sosoo ai

Take Care Of Yourself God

My daughter Stephanie has always been a very loving, caring child. She started out her prayers that night with the usual, “Dear God, help me not to have nightmares, and please, let it be nice tomorrow.” She was ready to close when she said very thoughtfully, “.....and dear God, please take care of yourself. You are always doing so much for other people. Take some time out and do something special for yourself. Rest up a bit. Amen.”

She looked up at me, an angelic smile on her face, then scrambled to scoot under the blankets. I am sure that God felt the same warm loving sensation that I experienced looking down into her smiling face. - tusia e **Penny Shoup**, lomía i le tusi: **God’s Vitamin C for the Spirit**

O le Oti ma le Tafaoata

ta nonofo? Na mu luga ae mata lalo. Na ou tau tagi, ae te fai mai, “Ou te le’i faaipoipo ia oe ona o sou iloa fai pai.”

Ua liliu ane nei le loomatua ma fai i lana tama teine, “Na ma faamau ma lou tama i le pikiniki a le A’oga Aso Sa.”

“Papa,” o Siosaia lea ua talanoa. “E te manatua le pikiniki na e faasino mai ai pe faapefea ona fai le maunu i le matau, ma ta la’u ofe? Na maua la’u i’a ma ou tau manua ai i isi tagata e o mai e matamata i la’u i’a ua maua.”

I le isi moega, ua tau mafitifiti a’e ai laumata o le tama, ae le o iloa atu e se isi. Na tau faalogo, e pei e mamao, mamao lava le mea lea e alu atu ai leo o le talanoaga.

“Mama,” o Maria lea ua talanoa, “matua fiafia lava matou i lo tatou aiga a o matou laiti, matou ma oulua ma Papa.” Ua tagi Maria, ua se’i a’e lona solosolo, ma solo ona mata. “Ma’imau pe ana mafai ona tatou fo’i i aso na a o matou laiti, a o lua talavou foi.” Ua gaoioi laugutu o le toeaina; ua

manavanava tetele, pupula mai, ma faasolo lana vaai i lona to’alua ma lana fanau.

“Hale,” ua toe musumusu atu le loomatua i lona to’alua, “ua gaogao lava le fale ona ua e le iai.” A o le taimi lea na liliu ane ai le ulu o le toeaina ma fai mai, “Mareta....!”

“Hale, lea ua matou iinei uma.”

“E ese lo’u fiafia i le Kerisimasi,” o Maria lea - “o meaalofo, o pesepesega a tagata e pepese mai fafo o lo tatou fale. Ou te manatua foi tama’i pasika, ma tama’i pepe taalo.”

I le isi moega, ua tau pulapula a’e ai mata o le tama. Na liliu ma vaai lelei mai ai i le aiga oloo talatalanoa ma le toeaina o Mekiloi. Ona ia faalogoina ai lea o pesepesega.

Fai mai le toeaina, “Ou te manatua mea uma a o tou tuputupu a’e. Ou te manatua lelei.”

Fai mai Siosaia ma vaai i lona tuafafine, “Se aso ona faaipoipo foi lea o Maria. Ona toe faaopoipo ai foi lea o nisi o lo tatou aiga.”

Fai mai Maria, “Ae le suia ai lava lo tatou aiga. O Papa ma Mama, o o tatou matua e oo i le faavavau, faavavau lava.”

“Ou te fia soo ia oe, Papa,” o Siosaia lea.

O le taimi lea na toe vaai mai ai le tama lea e ta’oto i le isi moega, ma na iloa uma mai ai le aiga, o si’osi’o se toeaina o ta’oto i le moega.

Ae fetauti ma le fai o le tala a le toeaina. “Si a’u fanau, talofa e, e ese lou tou lelei....lou tou alolofa ia ma’ua ma Mama.”

Ua tau mafaufau le tama poo fea na alu iai, ma fetauti ai lana taavale ma le loli. Na te le iloa le mea na faatutu iai lana taavale. Tasi o le mea, ua matua le toe fiafia i se mea, i se isi, soo se isi lava. Aua e leai ma se isi e amana’ia ia, ma mea na te fai. Na te matua le manatua lava se tagata na ia tausia ia. O Kerisimasi, na te le manatua ni Kerisimasi, pei ona manatua e le fanau le la e si’osi’o mai lo latou tama, ma talanoa fiafia ma o latou matua. E le’i ola ia i se aiga faapea.

“O le Aso Sa lea a sau, o le Eseta,” o le loomatua lea o Mareta ua talanoa. “Ua matua manaia lava fugalaau o le ta togalaau.”

Fai mai si toeaina i lona leo vaivai, “Lelei.”

faaauau itulau e sosoo ai

Na Faapefea Ona Mafai?

Na faapefea ona mafai e Iesu ona liua le lalolagi ae meamanu na o le 33 tausaga na soifua ai i le lalolagi, ma a’oa’o atu i le na o le tolu tausaga, i se vaega itiiti o le lalolagi na o le 44 maila le umi ae 25 maila le lautele? O le tali: o le avefa ma soo poo le faa-sooina o tagata. Discipleship! Na filifilia e Iesu nai alii

faaauau itulau e sosoo ai

O le Oti ma le Tafaoata

Ua manatua nei e le tama ma'i le Eseta. Na te iloa le upu. O le aso lea e o ai tagata i le lotu. Ae mo le a? O le a le mea na tupu i le Eseta?

Ua moeini Mekiloi. Ona fai atu ai lea o le loomatua ia Siasoi, ona savali ai lea o Siasoi i le faitoto'a ma fai atu i le foma'i, "Susu mai ia, lau Susuga."

Na tago atu le foma'i i le lima o Mekiloi, ma ia iloa ai, ua lata lava ina oti le toaina. Na vaai atu le loomatua i le foma'i, ae lulu mai lona ulu, ma na iloa ai, ua uma le ola o lona toalua. Ona fai atu ai lea i lana fanau, "E sili ona outou o i le fale. Se'i ou nofo tasi i lou tou tama."

Na feva'aia'i tamaiti, a ua masusu Ruta, ae fai atu iai lona to'alua o Siasoi "Faatali se'i oo i fafo ona e tagi lea."

"Tofa Papa! Papa tofa!" o Siasoi lea. "Taeao a'ena tatou toe

feiloa'i."

"I le taeao fou Papa!" o Maria lea. "I le malamalama ma le pupula manaia o le aso fou." Na pupula a'e lona tama ma iloa lona afafine o Maria, a ua leai se upu.

Ua o le fanau a le ulugalii, ae vaai mai le tama mai lona moega, iloa mai le toaina ma le loomatua. O le a nei le mea a sosoo? Ua amata ona tagi, ae le mo le toaina ma le loomatua, ae mo ia. Aua na te le'i iloa so na tama. Na oti lona tina o laitiiti lava. O le faalavelave lea o ia, e leai so na aiga. E mafai ona e fanau mai, ma ola a'e faatasi ma isi tamaiti i le nofoaga e iai tamaiti e leai ni matua ma e manatu ai o se mea lelei, ae leai.

Lea ua toe talanoa le loomatua i lona to'alua. "Hale, e tele mea ta te manatua, mea e tele sa ta fiafia ai. Aemaise si a ta fanau. O oe o se to'alua lelei Hale. O se tane lelei na te faafiafiaina lana ava.

Hale, na e faia a'u ma fafine fiafia. Na aulelei lo'u tagata ona o oe. Na e aumaia mo a'u se fanau amio lelei ma le aulelei. E te manatua lalo o le laau lea na e 'u'u ai lo'u lima ma e fai mai ia a'u e te fia faaipoipo ia a'u?" O le taimi lea na autago ane ai le lima o Hale i le lima o lona to'alua. Ua 'u'u lima nei. "Lo'u lima lea! Oi le Alii e! Se'i e fesoasoani mai, le Alii e!" Ua tagi le loomatua, ma fai atu. "O taimi uma ou te ui ane ai i tafatafa o le laau lona, ou te manatua ai lou valea ia a'u. Lou alofa ia a'u."

"Mareta!" E tau le lagona atu e le loomatua le leo o Hale. "O a'u lea, Hale." Na faafuase'i ona pupula lelei mai o le toaina, ma vaai mai i si loomatua, ona 'ata ai lea ma fai ane, "Manaia si o ta aiga." Na moumou malie atu lona leo, ma matala lemu atu lana 'u'ulima. Ona moe ai lea.

Ua fia tagi le tama oi le isi moega. E le'i tagi lava talu mai lona laitiiti.

Ua tagi le loomatua, ma tafe ifo ona loimata i ona alafau. O ni nai minute, ona ia tuu ai lea i lalo le lima o lona toalua. Na tatala lana'ato, ma se'i a'e i luga le tama'i tusi, ma amata ona faitau ma faaleo upu, a o tafe ifo lava loimata i ona alafau.

"O le Alii, o lo'u Leoleo Mamoe o ia, e leai se mea ou te mativa ai...."

Na faalogo mai le tama i upu o faitauina. Ua ia manatua o se tala i le Tusi Paia. O le nofoaga mo tamaiti e leai ni matua na ia mua'i faalogo iai. Ae na te le'i iloa lo latou uiga. A o lea ua ia iloa nei lo latou uiga. Ua ia iloa e le fefe le toaina i le oti.

"E moni, e ui lava ina ou savali i le vanu o le ata o le oti, ou te le fefe lava i se mea leaga."

faaauau itulau e sosoo ai

O Ai Iesu?
O "O A'u" e Fitu a Iesu

O a'u o le areto o le ola.....Ioane 6:35, 48
O a'u o le malamalama o le lalolagi....Ioane:8:12; 9:5
O a'u o le faitoto'a.....Ioane 10: 7,9
O a'u le leoleo mamoe lelei.....Ioane 10:11,14
O a'u le toe tu ma le ola.....Ioane 11:25
O a'u le ala, ma le upu moni, ma le ola.....Ioane 14: 6
O a'u le vine moni.....Ioane 15: 1,5

Na Faapefea Ona Mafai?
e to'a 12 e le o ni tagata iloga, ma ia a'oa'oina i tausaga e tolu e avea ma malosiga na te luluina le lalolagi. Na faamanaina i latou e le Agaga

o le Atua, ma latou laugaina atu le toe tu manumalo mai o Iesu nai le oti ma le tuugamau, ma lana folafolaga o le faamagaloina o agasala mo tagata uma o le lalolagi e talitonu ma faatuatua ia te ia.

O le Oti ma le Tafaoata

‘Aua e te fefe, o le mea lea o le la e fai atu ai le loomatua i le toeaina. E iai lou aiga, ma e matou te matua alolofa ia te oe.

Ua mafaufau ifo le tama, e le mafai e le loomatua ona galo lalo o le laau na ‘u’u ai lona lima e Hale, ma fai ane e fia faaipoipo ia ia. Ona faaipoipo ai lea, ma fai lo la aiga fou, ma maua a la tamaiti. Ua iai foi ma le fanau a Siasosi; a o se aso ona maua foi lea o se fanau a Maria.

Na ta’oto le tama ma faalogologo. Ua le toe fia lagi, a ua faalogologo i le loomatua o Mareta o faitau le tama’i tusi.

“Ou te nofo fo’i i le fale o le Alii i aso e tele lava.”

Ua tapuni le Tusi Paia e le loomatua, ma nofo ai lava mo se taimi umi. Ona tu ai lea i luga, punou ifo i luga o lona toalua, ma sogi iai.

“Tofa la’u pele. Se’ia ta toe feiloa’i i se aso.”

Ona savali ai lea i le faitotoa ma fai atu i le tausima’i, “O le a ou alu i lo matou aiga.” O le taimi lea na oo ane ai le foma’i ma fai ane i le loomatua, “Ua i’u le ola o le toeaina. Malo lava le loto tele.” Ae tali Mareta, “Leai, e le’i i’u. O le aiga na ma faia, o le a faaauau pea se’ia oo i le faavavau.”

Ona alu ai lea o Mareta. Ae ua malamalama le tama lea e ma’i i le isi moega, i le uiga o le faamatalaga a le loomatua. Na te le’i mafaufau lava i se taimi o lona olaga i le uiga o le ola, a o lenei ua ia iloa. O le alofa lea i se isi tagata, matua alofa iai ma oo ina e manao e lua te nonofo ma fai se lua aiga. E le toe taua le leai o se isi na alofa

ia ia, poo le leai o se isi na ia alofa iai. Ae ua manatu nei o ia, o le a fai sona aiga, ia pei o le aiga o le ‘au Mekiloi.

Na te’i le tama i le valaau mai a le foma’i, “Oi sole, ua leva ona e ala?”

“Leai, pe na o se minute pe a.”
“Malie lou loto, ae sa le tatau ona e vaavaai i toe taimi o le toeaina le la, leaga e te mafatia ai fua oe ma e fefe.” Ona valaau ai lea i le tausima’i e aumai se pupuni e tatau i le moega o le tama. O le taimi lea na taunuu mai ai ma tama faigaluega ma le moega faataavale, ua sii iai le toeaina ua maliu. E ui e le’i iloa atu e le tama ma’i, ae na ia iloa mea la e fai i talaatu o le pupuni. Na ia iloa foi o le a faatasi le aiga i lo latou fale, fai se latou mea’ai, ma faamafanafana ane Siasosi i lo latou tina e ‘aua le faanoanoa o lea e toatele lana fanau ma a latou fanau. Ae ui lava i lea o le a le mafai ona faagaloina e le loomatua le toeaina o Mekiloi.

Ua oo mai le filemu i le loto o le tama. O lea ua ia iloa le mea na mafua ai ona fanau o ia. Ma o le a le fefe i le oti. Na oo ina moe o ia, ae toe ala a’e, ua leai se pupuni. Ua leai se toeaina i le isi moega. Ua uma ona tapena le potu. Ua nofo a’e nei i luga ma mafaufau, o le ‘a le toe nofo toatasi. O le a fai sona aiga, aua o lea ua ia iloa le uiga o le aiga. O le a su’e sa na

galuega, su’e ma se teine aulelei, ioe, se teine aulelei. O le loomatua o Mareta e le taumate foi sa aulelei a o teinemuli.

Ua faasolo ane nei i le mafaufau o le tama le loomatua ma le toeaina lea ua oti, a o talavou, ma le taimi sa tutu ai i lalo o le laau ma ‘u’ulima, ma taumusumusu le alofa o le isi i le isi, ma faaali ai le fia faaipoipo o le tama tinoiti aulelei i le teine o ia ‘u’u mau lona lima, i lalo o le laau, ma tali ane le teine ua lelei.

Mafaufau le tama, o le a ia su’ea fo’i se teine aulelei, amio lelei, se teine e iloa foi kuka, ma teuteu se laau Kerisimasi. Peitai e tatau ona iai ni tamaiti e sisiva ma pisa i luma o le laau Kerisimasi. O lona uiga e fai sa na fanau. Aua ua ia talitonu na mafua ona fiafia le toeaina o Hale ma le loomatua o Mareta, ona o le la fanau. E oo mai le oti ae si’osi’o e le fanau alolofa ma fetagisi. E te malie lava e oo mai le oti pe a iai se fanau faapea.

Na te’i mai le tama i ona mafaufauga ona o le valaau mai a le teine tausima’i, “Oi sole! ua leva ona e ala?”

“Leai! Ae te iloa? Ua ou fia ‘ai. Aumai se ipu mea’ai tele tele lava. A uma ona ou ‘ai, ona ou alu ai loa lea. Ua ou malosi. O le a ou alu e su’e se teine e alofa ia a’u, ma fia nofo ia a’u, ma fai so ma aiga, sa ma fanau. Leaga ou te le’i iloa ni o’u matua ma so’u aiga. O le a fai so’u aiga e pei o le aiga o Mekiloi. Ae aumai muamua sa’u mea’ai se’i ‘ou ‘ai o’u alu ai”

tusia e Pearl S.Buck,

faamatalaina e

Afemata T. Apelu. Aiavao

The Greatest Thing

The greatest thing is, not that one shall be a scientist, important as that is; nor that one shall be a statesman, vastly important as that is; nor even that one shall be a theologian, immeasurably important as that is; but, the greatest thing of all is for one human being to bring another to Christ Jesus, the Saviour.

A Page for Youth

ITULAU MO TUPULAGA TALAVOU

Mai le Tusi Paia

Vaitafe o Eufirate: O le uiga o le upu Eufirate o le fua tele mai. O se tasi lenei o vaitafe e fa oloo faamatalaina i le Kenese 2: o Pisona, Kaiona, Hitekulu ma Eufirate, e tafe mai le Faatoaga i Etena. Na folafola e le Atua ia Aperaaamo o le a ia avatua mo ia o le laueleele e sau mai le vaitafe o le Naila seia oo atu i le vaitafe o le Eufirate.

I nei ona po, o le umi o le vaitafe

o le Eufirate e 1728 maila, ma e tafe atu i totonu o atunuu o Take (Turkey), Suria, ma Iraq, o atunuu lotu Moselemu uma.

Vaitafe o Ioritana:

O le Vaitafe o Ioritana e tafe mai le Mauga o Heremoni, e 1200 foot lona maualuga, i le itu i matu o Isaraelu. E tafe atu i le Sami o Kalilaia, (Sea of Galilee) ma oo atu i le Sami Mate (Dead Sea), i le umi e 250 maila. O le Sami Mate, o le vaega aupito maualalo lea o soo se

vaitafe i le lalolagi. I aso o faamatalaina i le Tusi Paia, na lauiloa ai le Vaitafe o le Ioritana ona o le lafulemu o ona auvai ma ola lelei ai mea. O le vaitafe foi lenei na laasia e Iosua ma tagata o Isaraelu ina ia latou taunuu ai i Kanana ma latou faato'ilaloina. O le vaitafe foi lenei na sopo'ia e Elia ma Elisara ina ua matutu le alitivai. Na faamamaina ai foi Naamanu mai lona lepela ina ua tofu faafitu iai e tusa ma le faatonuga a le perofeta. Na papatisoina ai foi Iesu e Ioane le Papatiso.

I nei aso, o le Vaitafe o Ioritana o le tuaoi lea o malo o Isaraelu ma Ioritana. (Iosua 3: 15-17; 2 Tupu: 2: 8-14; 5:14; Mareko 1:9)

Faafiti Saina i le Sauaina o Kerisiano

Ua suaina i lalo e masini pulutousa e Saina se malumalu matua tele lava o Kerisiano i le aai o Wenzhou, o se aai tu matafaga e masani ona faaigoaina o "Ierusalema i Sasa'e" ona o le toatele o Kerisiano e nonofo ai.

Fai mai le pulega o le aai, e solitulafono le falesa, ona ua matua tele naunau ma ua 400 pasene ua sili atu ai lona tele i le tele e faatagaina mo falesa ina ia 'auna ne'i tu matilatila ai i le aai. Ae fai mai tagata Kerisiano, o le amataga lea o lo latou sauaina, ma le taofiofia o lo latou tuputupu a'e i le aai ma le atunuu o Saina.

O lenei falesa e 12 tausaga o fausia i le tau e \$4.7 miliona Tala Amerika. O ona falelogo maualuluga o se faailoga lava lea o le soifua tapua'i o tagata Kerisiano i lea aai, lea e tusa o le 15% lo latou aofa'i i le aofa'iga atoa o tagata o le aai.

O le Aso Gafua mulimuli o le masina o Aperila ua mavae na

faapotopoto ai le toatele o le 'au Kerisiano i lea aai i totonu o lo latou malumalu fou, e faailoa ai lo latou tetee i le mea o le a fai. Peitai e le'i mafai ona latou taofia masini pulutousa na taunuu atu ma amata ona talepe i lalo le malumalu ua 12 tausaga o fau.

O le falesa na faatagaina e le malo o Saina lona faatuina, ma e na viia foi e le pulega o le aai oloo tu ai, le manaia o lona tu mai i le aai, ma latou faamalo ai foi i inisia na latou tusia le ata o le malumalu. Ae te'i ane ua sui le fati a le pulega, ma fai mai e solitulafono le malumalu ona ua tele na'ua.

Fai mai le pulega o le aai sa tataua ona na'o le 1881 sikuea mita le tele o le fale, peitai na oo atu i le 7928 sikuea mita lona tele. Fai mai na faatonuina Kerisiano ina ia faaitiitia le tele o le fale, ae oo atu i le taimi e faagata ai lea faatonuga, o le aso 22 lea o Aperila ua mavae, e na o le 500 sikuea mita ua aveese.

Ua su'esu'eina nei ni tagata se to'a lima o le pulega o le aai, ona o le fausiaina o lenei malumalu tele. Ae fai mai le au Kerisiano i Amerika, o le faailoga lenei o le taumafai o Saina e taofiofi le tuputupu a'e o le Ekalesia Kerisiano i Saina.

Fai mai se molimau a se ofisa sinia o le pulega o le aai, ina ua mae'a sa na asiasiga i falesa uma i lea aai, na ia mauiinoa ai, ua matilatila tele le tutu mai o falesa o tagata Kerisiano.

I le pulega lava ia faa-komunisi talu mai le tausaga e 1949 na tula'i mai ai i lalo o le ta'ita'iga a lo latou ta'ita'i komunisi o Mao Tze Tung, e le talitonu le Malo o Saina i le Atua. Peitai oloo tuputupu a'e pea le toatele o Kerisiano i Saina. I faamaumauga o fuainumera na faia i le tausaga e 2010, na maua ai ua oo i le 67 miliona tagata Kerisiano i Saina. A o Saina e sili atu i le tasi piliona ma le toluselau miliona ona tagata. O lona uiga, o Saina le isi atunuu lea e matua toatele lava Kerisiano oloo iai.

Tatou tatalo mo o tatou uso Kerisiano i Saina, ma i latou o sauaina i atunuu e pulea faalotu Moselemi. A tatou faitau pe matamata foi i televise i sauaga o puapuagatia ai Kerisiano i isi atunuu, ona tataua ai lea ona tatou faafetai i le Atua ona o le filemu ma le sa'olotoga o tatou maua i lo tatou atunuu

‘Aua ou te alofa ia ‘oe’ “.....because I love you.....!”

O le manaia ia o le aso i se taimi o le tau e totogoa’e ai mea. Na ou tago atu i la’u saniusi mo la’u ‘aiga o le sefululua, ma ou savali i fafo ma ou nofonofo i le nofoa i lalo o se laau paolo. Na o a’u, e leai ma se isi, ma ua manaia lava le tuu o lo’u ofisa ae ou alu ou te nofonofo i fafo ma ‘ai ai la’u saniusi. Pei lava o se pikiniki, ‘ae na o a’u e leai se isi.

I ia aso o lo’u olaga na o lo’u mafaufau lava i lo’u to’atasi, leai se to’alua mo ni tausaga ua tele talu ona ma tete’a ma lo’u to’alua. Ua mae’a ona ou tausia to’atasi la’u fanau i ia tausaga o le vai taimi o le 1990-2000. E le taumate o le ala lea ou te le’i fetau ai lava i se isi e ma te to’alua i le olaga nei, ma ou alofa iai ae alofa mai foi ia a’u.

Ou te le’i mafaufau lava ou te alu ou te faatasi atu i tafaoga i kalapu ma matafaga o ta’elega a fafine ma taulele’a talavou, o le vaega lea ua nonofo ta’ito’atasi foi

e pei o a’u aua ua tete’a foi ma o latou ta’ito’alua. Na ou matauina le vaega lea, e to’atele lava i tama’ita’i, pei o a’u. O le mafuaaga ona o le alu o o’u taimi i le tausiga o la’u tama teine i lana a’oga ma taaloga, ma ou asiasi foi i la’u fanau ua matutua ma a latou fanau. Faaopoopo atu i ia mea uma, lo’u auai lea i mea faalelotu.

I le matou ofisa, e feoloolo lava nai tama’ita’i o iai ua faaipoipo, ma e le te’a lava se aso ma se isi o latou e maua mai se teu fugalaau mai lana tane, o tusia ai ni upu e pei, “....Aua ou te alofa ia oe....” - ‘because I love you.’ Ou te matua fiafia lava i fugalaau, aemaise lava pe afai o auina mai ma ni upu e faafiafia loto e pei o le - ‘because I love you!’ - ‘Aua ou te alofa ia oe!’

Ou te le’i maua se olaga fiafia i tausaga e tele na ou nofotane ai. Ou te le’i maua mai foi i lo’u to’alua se teu fugalaau manaia o tusia ai se upu, ni upu, poo le a

lava, e faaalua mai ai - “Aua ou te alofa ia oe!” “Because I love you!” Na o lo’u moomoo i le taimi o lo’u nofotane, se’i aumaia e lo’u to’alua se teu faapea, se’i tata tetele ai lo’u fatu i le fiafia. E malepe lava lo’u aiga, e le’i faia e lo’u toalua se mea e faaali ai sona alofa ia au, na o puapuaga, ma mafatiaga.

‘A ‘o o’u nofo la i le laulau i fafo o lo’u ofisa ma ‘ai la’u saniusi, ae ou faalogo atu o to’ulu i luga o lo’u ulu fuga o le laau lea e pei e ofoofota’i mai ona lala ua mamafa i ona fuga mumu ma lanumoli. Na ou tepa a’e i luga ma ou iloa ai le manaia o lanu o fugalaau o le laau. A na ou le tepa a’e i luga, ou te le iloa ma ou manatua, le manaia o fuga o le laau.

Ona ou manatu ifo ai loa lea, e peiseai o le laau, o se teufugalaau, lea ua faapepepepe mai nisi o fuga ma pa’u’u i luga o lo’u ulu ma lo’u tino atoa. Na fai lea ma mea na ou mafaufau ai, e le tuulafoa’iina a’u e le Atua! O le laau, o lana teufugalaau, lea ua ia faato’ulu ifo nisi o ona fuga ma lilofia ai lo’u tagata - Aisea? - “aua e alofa ia te a’u” - ‘because He loves me!’

Na uma la’u saniusi ona ou tu lea i luga ma ou faapea ifo, “E uiga ese ala e musumusumu mai ai le Alii!”
tusia e Suzanne E Diaz
faamatalaina e
Afemata T. Apelu Aiavao

Na Taulotoina e Viliamu Uilipafosi le Salamo e 71

Ina ua avea Viliamu Uilipafosi ma sui faipule o le palemene o Peretania, na ia manatu ai e faaaogaina lona talitonuga i le Alii i lona tofiga fou, e ui lava e le se mea faigofie i le lalolagi faapolokiki. Na sailia e ia se fesoasoani mai se faifeau faatuatuaina o Ioane Niutone, o se tagata sa auai i le fefaataua’iga o tagata pologa, a o leni ua tetele iai ina ua avea ma faifeau. Na

fautuaina e Niutone ia Uilipafosi e nofo ai pea i le palemene, ma taumafai e tetele i le fefaataua’iga o tagata e fai ma pologa (slaves).

Na oo ina manuia taumafaiga a Uilipafosi, ma pasia ai se tulafono e faasaina ai le faatau o tagata e fai ma pologa i le tausaga e 1807, i le malo o Peretania. Ae le’i faigofie. Sa matua tetele fefinaua’iga i le Palemene o Peretania i lea mataupu e ui lava

ua pasia le tulafono.

O se isi aso na malolo atu ai Uilipafosi ina ua mae’a le palemene, na ia fai ai i lona to’alua e faapea: “Ua ta fiu i le malosi o le tetele mai o tagata. A ua ou taulotoina le Salamo e 71 e fai lea ma o’u fesoasoani, ma faamafanafanaga ia te a’u. E faalototeleina foi a’u pe a ou loto vaivai.”

Fai mai le Salamo e 71: 5: “Aua o oe lava o lo’u faamoemoega, le Alii e, le Alii e, o lo’u faatuatuaaga oe talu ina o’u tamaitiiti.”

O se vaega o le Uili a Iesu

“Ou te tuuina atu ia te outou.....”

E le taumate o Iesu toetoe lava ina a leai se tupe sa ia te ia, poo se tupe na tuu iai e ona matua ina ua tuua e ia lona aiga ae aga atu i le misiona na mafua ai ona tuua e ia o lona mamalu i le lagi, ae afio mai i le lalolagi.

Ae ui lava i lea, na ia tuua se tasi o uili e aupito sili ona tele ma o’oo’o. O lea uili e le’i molimauina e se loia. E le’i faamaufaailogaina faale-tulafono. E le’i sainia e se tasi. Ae na tuu i le mafai ona manatua e tagata na alolofa ia te ia, ma e tele ni tausaga faato’a latou tusitusia i lalo upu o le uili.

1**** Na tuu e ia le *mea lilo o le manuia*. E fia le tau o le manuia pe a faaliu tupe? E fia lona tau i totonu o se aiga malepelepe? E fia lona tau i se mafaufau vevesi i popolega o le lalolagi? E fia lona tau i malo tetele o le lalolagi ma o latou eseeseaga?

Ua fetalai le Alii, **“Ou te tuuina atu ia te outou le manuia. O lo’u manuia ou te avatu ai ia te outou.”** “My peace I give unto you.” O lana uili lea! - “Ou te tuuina atu ia te outou le manuia.” 2.**** Na ia folafola i ona soo le malosi. O lo tatou lalolagi e tauva i le malosi, le malosi lea e loto ma’a’a ai ma manatu faapito ma faamaualuga - i le va o tagata; va o aiga; va o atunuu. Ae le o le malosi lea na tuu e le Alii. Na ia folafola le malosi e lavatia ai; e talitonu ai; e faamoemoe ai; e faamagalo ai; e faagalagalo ai; e faatuatua ai ma faalagolago i le Atua; ma le malosi e mafai ai e le tagata ona tuuina atu lona ola e sui ai lana uo.

3****Ma le mea mulimuli, na tuuina mai e ia le poloaiga. O se mea lava lea e tele ina fai e tagata ia latou uili - o se poloaiga, (command). O le a le poloaiga? - **“O la’u poloaiga lenei, ia outou fealofani, pei ona ou alofa atu ia te outou.”**

O Aperamo Linikone ma le Uili a Keriso

O Aperamo Linikone, le peresetene ta’uta’ua ma le logologoa o Amerika, e le se tagata lotu. E le alu i se lotu. Na fesili se tasi ia Linikone pe aisea e le alu ai i se lotu, ae tali:

“Ou te le’i auai atu lava i se lotu ona o le faigata ona ou tuuina atu lo’u maliega, i feteena’iga o talitonuga autu o tagata Kerisiano oloo faavae ai a latou molimau ma lo latou faatuatua ma lo latou olaga i aso taitasi. Ae afai e faapipii e se lotu i luma o lona pulelaa, le auala e tasi e mafai ai e se tagata ona ave a ma se tasi o le Ekalesia, le fetalaiga a le Faaola oloo faapuupu ai le tulafono ma le Tala Lelei, o lea fetalaiga oloo faapea mai: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa. E te alofa atu foi i le lua te tuaoi ia pei o oe lava ia te oe. Afai e faia ia mea e tagata, o le a ou auai i tapuaiga ma lo’u loto atoa, ma lo’u agaga atoa, ma lou manatu atoa.”

E ui lava o Linikone e le o se tagata lotu, a o mataupu na faavaeina ai lona olaga ma lana galuega i tofi sa iai, e aliali mai ai lava lona malamalama i faavae o le Ekalesia Kerisiano, e pei ona ia lauina mai le alofa i le Atua, ma le alofa i le lua te tuaoi oloo faamatala i luga. Pe tusa o le

sefulu o ona tausaga ae amata ona ia faitauina le Tusi Paia muamua lava na avatu i lona aiga. O ina na faavae mai ai ona talitonuga maumaututu i nisi o mataupu sa fai ma faafitauli i le lalolagi, aemaise Amerika, i ia vai taimi, e pei o le faasa’olotoina o tagata uli mai le nofo pologa (slavery). Na ia malamalama i lona faitauina o le Tusi Paia, o le faalagolago i le Atua e matua mana’omia lea e soo se tasi e fia ave a ma ta’ita’i o tagata poo se malo. E ui lava la na te le’i faaaogaina lea malamalama i taimi o lona talavou ma taimi o lona faamatua-tagata - le lotu, le tatalo i sauniga tetele a le malo, ae na ia matua lagona lava le taua ina ua faae’e le avega o le tofi peresitene i lona tagata. I le taimi ina ua peresitene ma feagai ai ma faafitauli o le malo o ia ta’ita’ia, na ia faaalua ai e faapea:

“E matua tele taimi na ou tootuli ai ina ua ou iloa e leai lava se isi mea ou te alu iai. O lo’u atamai faapea ma le poto sa i tagata sa fesoasoani mai e matua le lava lava lea e fo’ia ai faafitauli”

Mulimuli ane ona ia tusia lea e faapea: “O mea uma na tuuina mai e le Faaola mo le lalolagi oloo tusia i le Tusi Paia. A na leai le Tusi Paia tatou te le iloa le lelei mai le leaga. O mea uma e mana’omia mo le manuia o le tagata nei ma a taeao, oloo tusia uma i le Tusi. Ma o le Tusi Paia o se mea alofa lea e aupito sili ona lelei na tuuina mai e le Atua mo tagata.”

O le Vatikano i Roma

O le Vatikano i Roma, i totonu o Italia, o le atunuu aupito laitiiti lea i le lalolagi, e na o le tusa o le 1000 tagata e nonofo ai. O lona tele e laitiiti ifo i le ‘afa sikuea kilomita. O le Vatikano, o le nofoaga tutotonu lea, poo le laumua, o le Ekalesia Katoliko Roma i le lalolagi.

O E UA MALILIU

Suli John Aull

4 Aperila 1921 - 25 Aperila 2014

“O Suli e le’i faia lava sona aiga, ona ua faaipoipo ma le lotu.”

O le toeaina matua, ma o le Toe Ulutaia o le aulotu i Suva i Fiti.

Na soifua mai i le aso 4 Aperila 1921, ae malii i le aso 25 Aperila 2014, ina ua 93 tausaga o lona soifua.

O lona tama o le alii Siamani o William Aull, na faaipoipo ma Malama o Safune, Savaii. Na malaga i Fiti ona matua i le 1920, ma nonofo i Levuka, o le taulaga lea o Fiti i na aso.

O Suli o le ulumatua o le fanau e to’avalu. Na aumai i Samoa e le tina o lona tina a o pepe lava, ma tausia ai e le uso o lona tina o Fuasou. Sa soifua a’e i Safune i le aiga o Taule’ale’ausumai, faapea ma Solosolo i le aiga o Leota Leuluai alii ma Taulapapa.

Na toe foi mai i Fiti ina ua 18 ona tausaga ma nofo ai i Suva, o le taulaga lea o Fiti ua iai e oo mai nei.

E iloga lona toe foi mai i Fiti, ona ua auai i le LMS, a o lona aiga i Fiti, e auai i le Katoliko Roma. Ae peitai sa talia lelei ma faaaloaloga e lona aiga atoa lana tapuaiga, ma avea ai le LMS ma Ekalesia lona lua mo le aiga. E o lava Suli ma Malama lona tina i le lotu LMS, ae auai le tama ma isi o le fanau i le lotu Katoliko Roma.

O Suli o se tagata faamaoni tele i lana Ekalesia. Fai mai Morgan Tuimalealiifano i lana molimau i le aso o ona toe sauniga: “O Suli e le’i faia lava sona aiga, ona ua faaipoipo ma le lotu.”

Atonu pe faamaonia lea molimau e le toatele o i latou sa mafuta ma

silafia, lenei auauna aoga; aemaise foi o le aufaigaluega faifeau, sa o latou galulue i le taimi o lona malosi.

Ou te taunuu mai i le galuega i Suva nei i le 2008, ua le o toe auai mai Suli i sauniga lotu faitele ona ua matua lona soifua. Ae o taimi matou te asiasi atu ai, e faaalua lona agaga fiafia e feiloai ma talatalanoa i le gagana Samoa; aua o se toeaina e mimita tele i lona tomai faafailauga e ui o le tele o ana fetalaiga e paso ai taliga e tau faafesootai. E leai sona gasegase ae ona ua matua lava lona soifua, ma malii filemu ai i lona aiga.

O ona toe sauniga sa faia lava i le malumalu o le Ekalesia EFKS i Suva i le Aso Lulu 30 Aperila. O

a’u sa ta’ita’ia le sauniga. O e na saunia molimau o Morgan Tuimalealiifano, Claire Aull, (tuafafine), Aliimuamua Esekia Solofa, ma Herema Tiatia Pouono. Sa ou faaopoopo sina molimau puupuu i le mafutaga ma le tama.

Na maea le sauniga ona momoli ai lea o lona tino malii mo lona tuugamau i le Suva Cemetery, ma matou faatofa ai ia te ia i le pese: “Talofa uso e, Tofaina oe...!”

O Iesu lava ua fetalai mai, “Le auauna lelei e ma le faamaoni...ina ulufale mai ia i le fiafia o lou Matai.” Ia manuia le malaga a le Afioga i le alii tiakono, o Suli John Sione Aull.

Afa Afato FS,
Suva Fiti.

Sapati Mafai Mokeni Esekielu

18 Aokuso 1940 - 20 Setema 2013

O le Tiakono Tina o le Ekalesia Faapotopotoga Kerisiano i Samoa Greenlane Aukilani Niu Sila.

Na soifua mai o ia i le aso 18 o Aokuso 1940 seia oo mai i le aso 20 o Setema 2013 mai ona matua o Fili Matamea Esau ma le tina o Tina o Auala, Savaii.

Na faaipoipo ma faatasi ma Mokeni Esekielu o Fasitootai ma nonofo ai lava i le tele o lona soifua. Ou te taunuu mai i Fasitootai i le faaiuga o le 1977 o tauga osoosoga ia o lona malosi.

O i la’ua sa tauavea le monotaga a Lealaisalanoa i le nuu ma le aulotu. Na tuua Samoa ae malaga mai i Niu Sila seia oo ina malii Mokeni i le 1989 ona nonofo ai lava lea ma si ana fanau. Na matou malaga mai ma galulue i Takanini ma toe feiloai ai ma faaauau ai lana auaunga i le Atua e ala i lona tofi tiakono ina ua amata le galuega i

le aulotu fou o Greenlane seia oo ina valaau mai lona Matai i le aso e pei ona taua i luga.

O lona gasegase e le’i puupuu se taimi, sa ese foi le matega a foma’i, peitai e aua lava mea uma i le pule tutasi a le Atua. Sa fale fafo, fafo fale i le falemai i Middlemore. O nisi lava taimi e maofa ai le lotu i vavega o Keriso. Le tioa a saafi le tama Sa-Eperu ma fai ane, ‘Lo’u agaga e, ia e faamanu atu i le Alii, o mea uma foi oi totonu ia te au, ia faamanu i lona suafa paia. Aisea? Ioe, o le faamaloloina ou ma’i atoa uma, o le faaolaina mai lou ola ai le tuugamau. O faaaliga na ma le tele o le mau molimau ola i le alofa silisiliese o le Alii o Iesu mo ona tagata.

Sa ou faamavae iai ina o le a ou alu i le Mafutaga Faafouina a faifeau ia Aokuso 2013. Sa ou fai iai faatali atu sei ou alu i le mafutaga o’u sau ai. Ou te foi mai lava o malosi ma fiafia. E le’i utuva ona tauasiasi ma vaavaaitu. Peitai o lau asiasiga masani i le

faaauau itulau e sosoo ai

O E UA MALILIU

Sapati Mafai **Mokeni Esekielu** 18 Aokuso 1940 - 20 Setema 2013

Aso Tofi 19 Setema 2013 na ou iloa ai ua sui mai nai lo taimi uma ua tuanai. Sa ma failotu iai i le po ua faatasi uma foi le fanau ma aiga. Sa matou faatofa atu ia te ia ma le faamoemoe e feiloai i le taeao e sosoo ai. Peitai o le itula e 5 i le vaveao na valaau mai ai le alii a'oa'o o Matamea Esekielu o lana ulumatua lea, e logo mai ua moe filemu Mafai i aao faavavau o lona Matai. E le'i goto lona la, ae ua tape lana lamepa aua ua oo mai le malamalama o le ola fou ia Keriso.

O lona lotu faaleaiga sa faia lava i lona aiga. A o lona lotu mulimuli sa faia lava i le Fale Tapua'i o le aulotu i Greenlane ona o lona manao ina ia faia pea i le fanua na latou fofoa ina ua fanau lenei aulotu fou.

O au sa taitaia le sauniga, o Tone Leituala FS na ia aumaia lona tino malii i totonu. O Maone Leausa FS na faitauina le Tusi Paia, o Iosefa Tiatia FS na saunia talosaga a o Rev. Dr Featuna'i Liuaana FS na saunia le lauga. O molimau na saunia e tama o le aiga, ma le A'oa'o o Matamea Sila Esekielu. Sa ou molimau i la ma mafutaga ma lona soifua tautua i le lotu. O le matua o la'u molimau o le Luka 22:27b. "A o a'u nei oloo ia te outou pei o le auauna lava." O le anava a le tamalii o le auauna, ma o le auauna lava le auauna. Na soifua mai Mafai o le auauna. Na amata lava ina ua faatasi ma le taule'ale'a o le tagata tautua i le matai. O taimi uma o a'u asiasiga a o iai i Fasitootai e te le maua lava i le fale, e te maua pea o ia i le tunoa i le tapenaga o taumafa mo lona aiga. E masani ma i'ofi ma le valusaga, o le 'asi ma le sasa'e.

O le tanoa tu'ikoko ma le umete. E mafolafola lana tauvela ma maa o lana ogaumu e mafaia i le vaai aua o le mae'a o lenei gasesega o le sauni foi lea mo isi feau faatagata tautua. E le nofo i le talaluma poo le tala o le fale, e saofa'i lava i le talatua i le nofoaga o le 'augasese. E lelei lona lotu. E tamalii ona uiga ma filemu. E la'ei mama ma atamai i tu faa-tamaitai ma tina.

Na usufono i Malua i le 2007. O ia foi sa avea ma komiti o le sene ina ua amata le aulotu nei seia oo mai lava ina ua le fafai ona ma o e toe tala se tupe ina ua gasegase. O lona lotu lava foi lea na manao ai e aua le avea lona toe sauniga i se falesa o la matou pulega, ae ua lava pea si o matou Fale Tapua'i e fai uma ai ona sauniga. Na mamalu lava lona lotu aua soo se mea e potopoto ai se toalua i le suafa o

Iesu, o ia lava le numera faasili.

Fai mai Iesu i lana saunoaga i le motu o tagata; o ai o outou e ana le auauna e galue i le aso atoa ae manava mai e faafetai atu ea o ia i lea auauna ina ua uma ona faia o ia mea uma? Fai mai Iesu 'ai lava e leai. Aisea? O le auauna lava le auauna. Ae ui lava i lea, na toe saunoa foi le Alii fai mai: 'Amu'ia lea auauna pe a sau lona Alii e maua mai oloo faapea ona fai. E fusi e ia ona ofu, ma alu ane ma auauna mai, ae tatou saofafa'i ma aai.

Ona taunuu ai lea o le upu i le Vaimauga: 'Ua fai 'ai le Malietoa ae tali'ai Alaoa.' Na faaiu ona sauniga i le fanua malii i Papatoetoe.

E ala oe pe a mavae le po. Tofa! Tofa! Tofaina loa.

Rev. T. Misikopa Loli FS
EFKS Greenlane.

Ulupoao Pepe **Sioka Sane**

24 Mati 1934 - 18 Iulai 2013

O le alii tiakono o le Ekalesia Faapotopotoga Kerisiano Samoa i Greenlane Aukilani Niu Sila, Pulega a Maungakiekie.

O Ulupoao ma le faletua ia Mele Sane, na amata galulue i le Ekalesia PIC ina ua faatoa taunuu mai i Niu Sila. E tele ni tausaga sa galulue ai i le toeaia o Leua Iusitini Sio. Ona siitia mai lea ma alala i Mangere ma amata galulue ai loa i le Toeaia o Manase ma le faletua ia Tuputala ona ua mamao Aukilani. Sa iai i le faavaeina o le Puaseisei i Mangere i Sasae. Na vaeluaina le aulotu ma o ese ai seia oo ina latou toe faatuina ma amata le galuega fou i Mangere i Sisifo ua faaigoaina 'O le Alefa ma le Omeka, i le taitaiga lava a le tama ia Manase ma Tuputala.


Na malolo penisione Manase ae galulue ai pea mo ni tausaga se tele i le Ekalesia. O le taeao o le Aso Sa 8 Aperila 2007 na omai ai i le lotu i la matou sauniga. Sa matou feiloa'i fiafia aua ma te le masani. Peitai o le Aso Sa lava na sosoo ai na omai ai ma faaulu loa lo la matafale. Mai lava i lena aso e le'i toe tepa i tua ae na momo'e punoua'i seia oo ina tini lana moliga-fu'a i le aso 18 Iulai 2013. Le tioa a Tavita ona sa'i ina ua malilii Saulo ma Ionatana: E! ua malilii toa ua maumau ai auupega o le taua. E itiiti aso o la matou mafutaga, ae o ni tausaga se tele pe a faatusa i lana auaunaga. E leai se tuaoi. E 'ai filofilo i soo se mea e fai o le galuega. E le'i faatali pe tau matau ona faato'a amata lea. O le aso lava na lotu mai ai na saofa'i ai i le aufaipese na pito matutua ai lava i le aufaipese. Sosoo atu i le autalavou, Mafutaga

faaauau itulau e sosoo ai

ATA O E UA MALILIU



Suli John Aull



**Sapati Mafai
Mokeni Esekielu**



**Ulupoao Pepe
Sioka Sane**

Ulupoao Pepe Sioka Sane

24 Mati 1934 - 18 Iulai 2013

a Tama; Komiti o Taaloga a le Pulega. Sa na faamaopoopoina le Au a Tama'ita'i. E nofo lava ia ma fai faailoga o trophies a le Au Talavou i iuga o le tausaga. E mama lona loto ma tautala sa'o. E le tomumu pe tau muimui. Ou te tau paie i isi taeao i Lotu Au Leoleo, ae le mafai aua e muamua mai lava pa'o ma tapena le lotu. Na usufono i le Fono Tele i le 2011 na mimita ai lava ina ua auaina i le Faamanatuga i le Iupeli. O Aso Sa uma e usu mai ai i le lotu e afe mai ai i le potu e sauni ai le faifeau mo le lotu. Ua iai le nofoa faapitoa e oo lava pe a iai foi se tofi lauga ou te tuu lava iai le tatalo e saunia ai le tofi mo le tapuaiga. E fiafia i tofiga a le Pulega ma le Matagaluega. Sa lauga foi i le Faiga Me a le Pulega i le tasi tausaga.

O se gasegase faigata sa feagai ma le tama na oo lava i Samoa i le tausaga lea na maliu ai i le malosi o le ma'i. E tasi le aso ae toe valaau atu Samoa i le tina e totogi atu lona pasese ua faigata le tulaga

ua oo iai le gasegase o le toeaina. O lana molimau pe a ou asiasi atu i le falemai, fai mai ua na iloa lona mai e le o toe umi, ae ua sauni ma ua malie lona loto i soo se taimi e finagalo ai lona Matai mo ia. E ausage si o la aiga, ae taumafai lava i le mea e gata ai lona malosi. O le ala lea o lona ma'i, e mafua mai i le pefu o le moagavao aua o lana galuega lea talu ona taunuu mai i Niu Sila. Fai mai o ia sa na moaina le vao a le Komesina o Niu Sila i Samoa ae le'i sau. E potu i auala e maua ai ana galuega, e pei o le te'i lava o se aiga e uumi le vao ua tu'itu'i atu ma fai iai poo ai lea na telefoni atu i se moav ao ona te'i lava lea ua maua faafuase'i aile galuega. E galue faasoloatoa i le vaiaso, ona alu loa lea i le Aso Toonai ua ao mai. Fai mai lana tala o tupe uma lava na e fai ai a la mea faalelotu. A o le la penefiti e totogi ai a la pili ma lo la fale.

Faata'ita'i nei ia Ulupoao lau faasoa, e le toina i le i'u, ae ave atoa. Ua umi le tala, ae le gase lo'u lima e tusi pea aoga o tagata faapea.

O lona lotu faaleaiga sa faia lava i lona fale. O au na taitai i lona falelauasiga ma avatu i totonu lona tino maliu. O Tone Leituala FS na

faitauina le Tusi Paia, o Maone Leausa FS na faia talosaga, a o Kafareli Sasagi na saunia le lauga. O le tina ia Mele Sane ma se tasi o le fanau ma le uso o le toeaina sa faia molimau. Na ou faaopoopo lona molimau faale-agaga ma le ma mafutaga. O pese na laiina lava e le aufaipese leo malie a Greenlane i lalo o le taitaiga a le faifeau, e pei foi o viiga o le sauniga o Mafai Mokeni ua tusia muamua atu. O le matua o la'u molimau, o le upu a Lapana i le auaina toeaina fai mea mae'a a Aperaamo o Elisara na auina e saili mai se ava ma Isaako, fai mai Lapana: "Maliu mai ia o oe ua faamanuiaina e le Alii, se a le mea ua e tu ai i fafo?...ua uma ona teuteua le fale." Ona ulufale lea o le tagata i le fale. Kenese 24:31,32. E logo i tino matagi lelei e oo i le loto ma faamalie agaga. E pei foi o le faataoto a Iesu i le Feagaiga Fou. Le auaina lelei e, ma le faamaoni, ua e faamaoni i nai mea itiiti, ou te tofia oe e pule i mea e tele, ulufale mai ia i le fiafia o lou alii.

E ala oe pe a mavae le po. Tofa! Tofa! Tofaina loa.

T. Misikopa Loli FS,
EFKS Greenlane.